


CELEBRACIÓN EN OS COTOS (na casa)

10-11 de xullo do 2021

XV DOMINGO DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO EN FAMILIA

SAÚDO DE BENVIDA

🎵 *Amigos nas penas e na festa*

Celebrante

Benvindos sexamos todos a esta celebración da nosa fe. Reunímonos para compartir a vida de Xesús e a nosa en familia, e facémolo no nome do Pai, e do Fillo e do Espírito Santo.

Na nosa vida, cada vez máis neste tempo, dámonos conta que non é todo fácil. Na vida de Xesús como mirabamos o domingo pasado tampouco, e por iso, cando envía aos seus discípulos a predicar a Boa Nova, dálles unhas instrucións moi concretas:

- * Terán que aliviar o sufrimento, humanizar a vida e facer medrar a liberdade e a fraternidade de todos cos que se atopen,
- * Levarán soamente o imprescindible: caxato e sandalias para camiñar,
- * Sen pan nin alforxas con cartos, para que aprendan a compartir a pobreza
- * Sen túnica de reposto, para ser un máis no medio da xente.

Se nós queremos de verdade ser discípulos de Xesús o primeiro que temos que facer é por en práctica estas recomendacións na nosa vida.

ACTO PENITENCIAL

Celebrante: *Xesús conta con nós para ser as súas testemuñas no mundo de hoxe, pero moitas veces a nosa vida non é conforme as súas exixencias, por iso lle pedimos perdón e que nos amose o seu camiño:*

Monitor/a:

- **Porque andamos tan ás carreiras que non buscamos na nosa vida lugares e tempos para a reflexión repousada do evanxeo ao que nos envías. Señor, amósanos o teu camiño**
- **Porque entendemos que o poder e o diñeiro son os camiños do ben, cando o teu camiño leva sempre a atender aos demais. Cristo, amósanos o teu camiño**
- **Porque soñamos a riqueza en vez de soñar a xustiza, soñamos o noso éxito e non o da comunidade. Señor, amósanos o teu camiño**

Celebrante: *Deus todopoderoso teña piedade de nós, dos que teñen un lugar no noso corazón e na nosa vida, dos que esperan unha palabra de alento e unha man que lles axude nos camiños da súa vida. A todos, o Señor, nos conceda o perdón e nos leve á vida eterna. Amén.*

ORACIÓN PROPIA DO DÍA

Celebrante *Rematamos a primeira parte da celebración comprometéndonos a vivir conforme ao que Xesús nos pide e lembrando aos misioneiros que levan a Boa Nova a todas as xentes. (silenzo)*

Celebrante:

Deus, Noso Pai, ti es a fonte de todo ben. Ensínanos a pensar o que é axeitado e axúdanos co teu alento a poñelo por obra acollendo a todas as persoas sen facer distincións. Pedímoscho polo mesmo Xesucristo, noso Irmán, que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Monitor/a:

Escoitaremos nas lecturas como temos a tarefa de ser enviados polo Señor a ser as súas testemuñas no medio do noso mundo.

Fomos elixidos na persoa de Cristo para ser a súa voz, as súas mans e o seu corazón. Isto exige de nós responsabilidade e esforzo diante de tantas dificultades e tristuras que se presentan na vida de cada día de tantas persoas que son rexeitadas e non respectadas pola nosa sociedade.

LECTURA DA CARTA DE SAN PAULO AOS EFESIOS

¡Bendito sexa o Deus e Pai do noso Señor Xesús Cristo, que por medio de Cristo nos bendiciu no ceo con toda clase de bendicións do Espírito! Porque nos escolleu antes da formación do mundo, para que fosemos santos e sen mancha perante El polo amor.

El decidiu xa daquela profillarnos por medio de Xesús Cristo, para El, conforme o designio da súa vontade, para louvanza da súa gloriosa benquerencia, coa que nos agraciou no Fillo amado, quen co seu sangue nos acadou a redención e o perdón dos pecados, en proba da xenerosidade da súa graza. E fíxoa rebordar sobre nós con toda sabedoría e intelixencia, ao nos descubrir o misterio da súa vontade, conforme o designio que El tiña para levar a historia á súa plenitude e, por medio de Cristo, levar a cabo a unidade do universo, do que hai no ceo e do que hai na terra.

Palabra do Señor

🎵 43 *Quen nos vai separar de Ti* SALMO

(en pé) Mc 6, 7-13 EVANXEO

PROCLAMACIÓN DO SANTO EVANXEO SEGUNDO MARCOS

Daquela, chamou Xesús os Doce, e empezou a mandalos de dous en dous, dándolles poder sobre os espíritos malos. Recomendoulles que non levasen nada para o camiño, fóra dun caxato: nin pan, nin alforxas, nin cartos na faixa. Que calzasen sandalias, pero que non levasen máis ca unha túnica. E avisounos:

- Cando entredes nunha casa, permanecede nela ata que vos marchedes. Se nalgún lugar non vos acolleren nin vos escoitaren, ídevos, sacudindo o po dos vosos pés, para que lles sirva de aviso.

Marcharon, e predicaron a conversión. Botaban fóra moitos demos, e curaban os enfermos, unxíndoos con aceite.

Palabra do Señor

(sentad@s) gardamos uns instantes de silencio para acoller a palabra no corazón



Xesús, as cousas que ti viviches e ensinaches atraénnos moito.

Nós queremos colaborar contigo, coma Pedro e André, coma Santiago e Xoán, coma a Magdalena, Xoana e Susana.

Nós pouco sabemos, pouco valemos e pouco podemos; pero no que saibamos, valamos e poidamos, conta con nós.

Para andar as terras da nosa parroquia á túa sombra e no teu nome, conta con nós.

Para ser pequenas testemuñas túas e das túas cousas de alivio para a xente ferida pola vida, conta con nós.

Para ser unha persoa máis neste pequeno grupo de irmáns e irmás que queremos experimentar a felicidade da comunidade, conta con nós.

Para o que Ti queiras, conta con nós.

Grazas por te fixares en nós e por escollernos.

Agora e sempre, pase o que pase, conta con nós.



Regal, M. “Xesús, aquel home de aldea”

(en pé)

PROFESIÓN DA FE

Celebrante: Neste encontro da igrexa do fogar no que renovamos os nosos compromisos con Xesús, queremos coma EL, anunciar o Evanxeo sabendo estar á beira da xente. Por iso moi orgullosos proclamamos a fe:

Creo, Señor, pero aumenta a miña fe

Monitor/a:

Credes en Deus Pai,

creador do ceo e máis da terra, que á súa imaxe e semellanza nos convida, non a impor as nosas razóns, senón a vivir na tolerancia e no diálogo entre culturas, relixións e sociedades?

Creo, Señor, pero aumenta a miña fe

Credes en Xesús,

que, coma aos discípulos, nos alenta a ofrecer aos demais a nosa solidariedade, o noso bo facer, dende a sinxeleza das nosas vidas e do noso xeito de vivir?

Creo, Señor, pero aumenta a miña fe

Credes no Espírito Santo,

que nos alenta e empuxa para sermos evanxeo á beira dos demais?

Creo, Señor, pero aumenta a miña fe

Credes na igrexa,

comunidade viva, chamada a facer crible o evanxeo nestas terras de Os Cotos?

Creo, Señor, pero aumenta a miña fe

ORACIÓN UNIVERSAL

Celebrante: *Oremos a Xesús, e como Igrexa poñamos nas súas mans os nosos mellores desexos para esta familia na que vivimos, agradecendo todo o que de bo hai entre nós. Oremos dicindo:*

SEÑOR, GUÍANOS NO TEU CAMIÑO

Monitor/a:

✓ Para que aprendamos a andar polos camiños de Deus solidarizándonos sempre cos máis pobres de entre nós e do mundo. Rezamos

✓ Para que, coma Deus nos pide, participemos en todo aquilo que promova máis xustiza na nosa terra e no mundo enteiro. Rezamos

✓ Para non calar a traxedia dos refuxiados, para non deixarnos levar pola crítica fácil. Rezamos

✓ Polos misioneiros e misioneiras que hoxe testemuñan o evanxeo polo mundo adiante. Rezamos

✓ Para que non calemos ante os actos de violencia e falta de respecto ante as persoas como o sucedido fai uns días na Coruña con Samuel. Rezamos

Celebrante: *Escoita, Señor, as nosas pregarías, e énchenos do alento que te levaba a estar sempre á beira dos veciños facéndote crible. Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *Sentíndonos irmáns de todos, e de xeito especial dos nosos veciños e veciñas, rezamos coma nos ensinou Xesús a Deus, que é Pai de todos. Rezamos:*

NOSO PAI ...

SIGNO DA PAZ

Celebrante: *Xesús acollía e transmitía paz e esperanza a todos. Coma El sexamos tamén nós EVANXEO CRIBLE nestes momentos de pandemia e dificultade, sabendo que o evanxeo faise dende a igualdade, faise con respecto, faise con tolerancia, faise con todas as mans atrevidas para coidar. Fagámolo.*

NON COMULGAMOS PERO ESTAMOS EN COMUÑÓN

Celebrante: *Xesús acóllenos a todos sen distincións para que nos deamos conta de que todos valem a pena para facer crible o Evanxeo. Aprecemos todo o que de bo hai á nosa beira, entre os nosos veciños e veciñas. E sintámonos orgullosos e ditosos por estar invitados a facer crible a Boa Nova do Señor.*

 **Ide e pregoade**

4.- AVISOS E DESPEDIDA

ORACIÓN FINAL

Celebrante:

Señor, dámosche as grazas por todas as persoas que no camiño da nosa vida son capaces de comprometerse de verdade estando ao lado dos que teñen problemas.

Agradecemos a vida dos que dan exemplo acollendo e compartindo. Grazas polo exemplo que nos dás en Xesús, o teu fillo benquerido, que vive e reina con nós por sempre eternamente. Amén

Con Xesús cremos que vale a pena facer evanxeo na sinxeleza da vida compartida en Os Cotos.

Con Xesús queremos facernos cribles e sen medo a ser exemplo dun mundo que respecta, na igualdade e nas diferenzas.

E con Xesús queremos dar grazas aos veciños e veciñas da parroquia que son para todos un bo exemplo na vida e na fe.

***Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén.***



“Ide e pregoade o EVANXEO”

Palabras do evanxeo de hoxe.